



EDITORIAL

Ipasulong an armado nga pakig-away agud tapuson an pasista nga paghahadi ni Duterte

Ginsasaludaran han katawhan Pili-pino an Bagong Hukbong Bayan ha Eastern Samar ha magkasunod nga madinaugon nga taktikal nga opensiba hini kontra ha pasista nga 52nd IB hini nga semana. Nagdurot an BHB han grabe nga kaswalti ha kaaway ngan nakakumpiska pa han armas. Dugang ini nga kusog ngan inspirasyon ha ngatanan nga yunit han BHB ngan ha masa agud dugang pa nga papintason an armado nga pag-ato ha pasista nga rehimen Duterte.

Malipayon nga gintatapo han masa nga anakbalhas an mga kadaugan han BHB komo baton ha natikakusog nira nga panawagan nga sirutan an abuso nga kaaway ngan mabayanihon nga panalipdan an katawhan. Patikang ini nga pagbaton ha maiha na nga hingyap han masa para ha hustisya ngan pagpabayad hin mahal ha mga pasista nga tropa han rehimen Duterte nga

waray wantas nga nanmamatay, nangigipit, nagpapasurender ngan nana-namok ha kabaryuhan ha Eastern Visayas ngan ha bug-os nga kamurupud-an.

Pakalabay han lima katuig ni Rodrigo Duterte ha poder, waray katugbang an hugaw han iya todo-gerra kontra ha katawhan. Karuyag pa niya ini pagrabihon pinaagi han pagpalit han dugang nga armas, pagrekluta para ha iya *death squad*, ngan ipadayon an kawaray hustisya. Karuyag niya umungbaw an kahadlok han katawhan, puypuyon an karuyagon nira nga umato, ngan magpabilin ha poder.

Ha atubangan han pasista nga panlasurbo han kaaway, kinahanglan ipasulong pa han BHB an armado nga pakig-away kontra ha rehimen Duterte. Kinahanglan parayhakon an ginerilya nga pakiggerra nga nakabasar ha natikahilarum ngan natikahiluag nga

Siyam nga tropa, kaswalti han 52nd IB ha ambus han BHB-Eastern Samar

DIRI MAMENOS HA upat nga sundalo an napatay samtang lima an grabe nga nasamaran ha madinaugon nga taktikal nga opensiba han BHB-Eastern Samar (Sergio Lobina Command o BHB-SLC) kontra ha mga CAFGU han 52nd IB ha Sitio Casapa, Barangay 4 Poblacion, Jipapad hadton Hulyo 7 han aga.

Subay ha report, gin-ambus han BHB-SLC an 14 nga tropa han kaaway gamit an tulo nga *command-detonated explosives* (CDX) samtang tikadto ha ira gintitindog nga detasment. Upod ha mga namatay an usa nga sarhento. Nakumpiska liwat han BHB-SLC an usa nga Gloc nga pistola, usa nga .45 kalibre nga pistola, ngan usa nga 9mm nga pistola. Lumastar hin 5 kaminutos an agway.

Upat kaadlaw antes hini, nakumpiska liwat han BHB-SLC an usa nga riple nga R-4 ha ambus kontra ha mga tropa han 52nd IB nga naghihimo han Retooled Community Support Program (RCSP) ha Sitio Casapa, Brgy. Denigpian, Dolores hadton Hulyo 3. Waray nahiaguman nga kaswalti an BHB-SLC.

An magkasunod nga taktikal nga opensiba han BHB, baton ha dirudiretso nga operasyon nga RCSP han mga tropa han 8th Infantry Division ha 16 nga baryo ha lima nga bungto ha norte han Eastern Samar tikang pa hadton Mayo.

Ginreklamo han mga paraguma an grabe nga pan-gigipit ngan panhahas han mga tropa nga RCSP ha ira. Dirudiretso an pagpasurender han mga sundalo, panhugay, ngan pan-nguwat pinaagi han mga proyekto han Barangay Development Program han National Task Force to End

Sumat ha tawhanon nga katungod ha 2021

An mahugaw nga gerra ni Duterte ha Eastern Visayas

Ha syahan nga katunga han tuig 2021, dirudiretso an pasista nga todo-gerra han rehimen Duterte ha rehiyon han Eastern Visayas. An ₱5 kabilyon kada tuig nga gin-gagastos kuno han rehimen Duterte kontra ha Bagong Hukbong Bayan (BHB) nahingadto la ha pangabuso, panharas ngan panribok ha mga komunidad. Diri la an BHB an target han ira pangatake kundi bisan mga sibilyan.

Iginbug-os han *Larab* an mga panalapas ha tawhanon nga katungod ngan operasyon kombat ha Eastern Visayas ha syahan nga unom kabulan han tuig. Klaro nga diin may damo nga operasyon militar, damo liwat an pangatake ha mga sibilyan. Damo nga kaso an waray pa mahilakip hini nga listahan, labina an damo nga biktima han panhulga, panharas ngan panarhug ha mga erya han weste han Northern Samar, ha sur-este han Eastern Samar, ha ikalima nga distrito han Leyte ngan ha Southern Leyte. Prinsipal nga pokus han operasyon militar ha rehiyon an syahan nga duha nga erya.

Todo-gerra ha mga komunidad

Ikatulo an Eastern Visayas ha may pinakadamo nga barangay nga apektado han mga panmilitar nga pangatake, kasunod han North Central Mindanao ngan Southern Tagalog, subay ha kalugaringon nga sumat ha tawhanon nga katungod han *Ang Bayan*. Kalakip gihapon an rehiyon ha syahan nga han-ay han nasyunal nga prayoridad han rehimen ha todo-gerra kontra ha BHB. Mayda gihapon 15 nga batalyon ngan duha nga kumpanya han pankombat nga yunit han AFP-PNP.

Ini nga mga berdugo nga yunit an responsable ha dirudilain nga pangatake ha mga komunidad. Ha lista han *Larab*, katunga hini nahitabo ha Northern Samar (49%). Partikular an Catarman, nagin pokus ini han grabe nga operasyon militar tungod ha pampulitika ngan pan-ekonomiya nga importansya hini ha naghahadi nga klase.

Ha Northern Samar liwat nahilista an kadam-an han mga panalapas ha tawhanon nga katungod, sugad han pangistraping han mga residente han Brgy. Cuenco, Las Navas hadton Pebrero, ngan ha magburugto nga Ogatcho ha Brgy. Balud, Silvino Lobos hadton Marso. Damo liwat nga kaso han pan-nguwat para makapatabong ha mga “peace rally” an nahisumat.

Ha Western Samar, gintambakan han gatus-gatos nga tropa an Oquendo District han Calbayog City para ha nakapokus nga operasyon militar hadin Mayo. Damo nga residente han Matuguinao an ginhugayan ngan ginpwera nga sumurender han kaaway han magtikang an kampanya nga pagpasurender hadton Disyembre 2020.

Ha Eastern Samar, landaw an nakapokus nga operasyon militar ngan RCSP ha Borongan City ngan mga kasapit hini nga bungto. Mayda liwat RCSP ha mga bungto ha norte

"Ipasulong...," tikang ha paypay 1

base panmasa. Ngatanan nga yunit han BHB kinahanglan maningkamot nga maglansar han mga taktikal nga opensiba, dako man o guti, dirudilain man an porma, ngan basar ha ira kapas ngan pampulitika nga kusog han masa. Kinahanglan himuon an kaangayan nga pangandam para ha paniktik ngan kontra-paniktik, pag-sikreto, lohistika, pinansya, medikal ngan armas agud maseguro an kadaugan han opensiba.

Yawe an mga taktikal nga opensiba han BHB agud pakyason ngan pagbaydon an mga pasista nga tropa nga grabe nga naniniyupi ngan nana-nalumpigos ha masa. Ha pagpintas han mga opensiba, maglalarab an ira kaisog ngan kaandaman nga umato, magkukusog an ira determinasyon ngan pursigido hira nga makikig-away tubtub ha mapabagsak hi Duterte. ■

"9 nga tropa...," tikang ha paypay 1

Local Communist Armed Conflict (NTF-ELCAC.)

Western Samar. Ginharas han usa katim han Bagong Hukbong Bayan-Arnulfo Ortiz Command (BHB-AOC) an detatsment han CAFGU han 46th IB ha Brgy. Layo, Pinabacdao hadton Mayo 8 dapit alas-5:30 han aga. Usa nga tropa han kaaway an kumpirmado nga napatay.

Usa liwat nga tropa han AFP an napatay han BHB-AOC han aktibo ini nga makagdependa apiki ha barangay Bangon ha Villareal hadton katapusan nga semana han Hunyo. ■



"Sumat ha...," sundan ha paypay 3

"Sumat ha...", "tikang ha paypay 2

han prubinsya. Hini nga lugar, waray wantas nga nagpabuto an kaaway ha mga umhanan bisan kun kat-ani para la ipagawas nga nagkamayda hira hin engkwentro kontra ha BHB.

Ha ngatanan nga prubinsya, padayon nga gin-gagamit an RCSP agud tahuban an pankombat-saywar-intelidyens nga operasyon ngan pangabuso ha mga baryo. Diin man mayda RCSP, dirudiretso liwat an panharas, panhugay, ngan panarhug han mga sundalo agud mapasurender an masa o hin-o man nga gintatahapan nga mayda sumpay ha rebolusyunaryo nga kagiusan. Nagbabalay-balay hira agud mag-interrogar ngan magpasurender ha tahub han waray katapusan nga "pagsensus." Naghihimo hira han mga pabilib nga serbisyo ngan proyekto agud ipasangil an ira presensya. Kundi, ginringgal naman han ira operasyon an pagpakabuhi han masa.

Mas naggrabe an pan-gigipit ha mga upisyal han barangay agud piriton nga direkta nga pumartisipar ha kampanya kontra-insurhensiya, bisan kun mga sibilyan hira. Ginuhugay hira gamit an "P20 kamilyon" nga balor han proyekto han National Task Force to End Local Communist Armed Conflict, samtang gintatarhug gamit han Anti-Terror Law. Ha mga sentro nga bungto ngan syudad, ginsasalawdan han hinimuhimo nga kaso an mga aktibista.

An waray wantas nga pagtamamas-tamas ha tawhanon nga katungod ngan pagpakuri ha masa amo an nagpapakusog han ira panawagan nga sirutan an mga pasista nga tropa han kaaway. Naduduso hira nga ipasulong an gerra han katawhan kontra ha terorista nga rehimen ni Duterte. ■



Buruhaton propaganda, usa nga kagiusan masa

Usa nga kaapi han Kabataang Makabayan ha baryo hi Julie, 18 anyos. Ha inadlaw-adlaw, diri niya ginbulag an iya *cellphone* agud mamati ha mga popular nga *singer* samtang nag-aaram han iya mga modyul.

"Ginlilibang kita han burges nga midya. Ginkokondisyon kita nga magin makaiya ngan igromantisa an aton personal nga eksperyensya, imbes nga siyentipiko nga kitaon naton an obhetibo nga kamutangan han aton katilingban," sigon kan Ka Susan, usa nga pampulitika nga instruktur han Bagong Hukbong Bayan.

Han umagi an mga kasama ha baryo nira Julie, gintagan hiya hin *playlist* han mga rebolusyunaryo nga kanta ngan *audio* nga bersyon han *Larab*. Ha yana, ginpapatian niya ini samtang gintatrabaho niya an iya modyul, naghimo han iya mga buruhaton ha panimalay, nabulig ha produksyon, ngan iba pa nga mga aktibidad.

Usa an *audio* nga bersyon ha mga paningkamot han kagiusan nga pahitas-on an pag-ato han katawhan kontra han hiluagan nga dis-impormasyon ngan saywar han pasista nga rehimen ni Duterte. Sanglit, pukaw gi-hap nga ginkaurusahan han kolektibo nira Julie nga ipasarang an *Larab* ha ira baryo pinaagi han makabag-o nga teknolohiya sugad han Bluetooth o ShareIt.


Pero samtang epektibo an *audio* nga bersyon ha madagmitan nga pagpasarang ha ranggo han masa, ginklaro ni Ka Susan nga an *audio* nga bersyon dugang la nga materyal ha buruhaton propaganda. "Gin-aaghat namon an mga yunit han hukbo tubtub ngadto ha mga organisasyon masa ha kabaryuhan nga diri la mamati ha *audio* nga bersyon kundi talakayon han mga grupo an mga barasahon han *Larab* ngan *Ang Bayan*. Dugang nga napapahilarum an

mga ideya pinaagi han kolektibo nga pag-aram ngan pagsumpay hini ha rebolusyunaryo nga praktika," sering ni Ka Susan.

Gin-gagawas an *Larab* kada semana nga mayda duha tubtub upat kapaypay. Ginhihigutan dinhi an magkadirudilain nga isyu hiunong ha rebolusyunaryo nga pakigbisog han katawhan ha Eastern Visayas. Kadungan hini, gin-gagawas an Winaray nga bersyon han *Ang Bayan* duha kabeses kada bulan.

Kagiusan masa an buruhaton propaganda. Hiluagan nga nagreprodus hin kopya han *Larab* ngan *Ang Bayan* an mga organisasyon masa ha usa nga klaster hin kabaryuhan ha usa nga dapit han Samar. Ha iba nga klaster, naghimo an mga organisasyon masa han operasyon tabaw nga mayda nakasurat nga "I Love NPA."

Sering pa ni Ka Susan: "Dirudilain an inisyatiba han masa ha buruhaton propaganda. Gin-aayat kita han panahon nga dugang nga parayhakon an pag-aram ngan pagpasamwak han midya han katawhan, komo usa nga natad ha pakig-awayan kasumpay han aton pagpukaw, pag-organisa, ngan pagpagios han masa kontra ha reaksyunaryo nga propaganda han rehimen Duterte."



Hugot nga pagkaurusa han BHB ngan masa, yawe ha pag-atubang ha RCSP

Ha usa nga prente gerilya ha Eastern Visayas, nagin yawe an mahugot nga pagsubaybay ngan pakikig-usa han Bagong Hukbong Bayan ha masa agud maungod hini nga atubangon an pira katuig nga sostenido nga operasyon nga Retooled Community Support Program (RCSP) han militar.

Hadin Abril tubtub Mayo, utro nga gin-urusa han lokal nga yunit han BHB an masa nga parag-uma tikang ha 20 nga barangay ngan sityo nga igsalikway an kampanya nga pagpa-surender han kaaway, pursigido nga makigbisog ngan ipasulong an demokratico nga rebolusyon han katawhan kontra ha pasista ngan pakuri nga rehimen Duterte.

Pagkikirigta pa la han masa ngan mga kasama, haros diri na mautod an ira ertestorya. Ginpasaro han masa an dirudilain nga gin-agian nira ha pag-atubang ha pangatake han kaaway ha ira mga barangay, sugad han pwersahay nga pagpasurender, interogasyon, pandakop, ngan panmatay ha ira mga kauropan ngan igkasi parag-uma.

Pira ha ira an diri malikyan nga tumangis dara han kasubo ha mga panhitabo. Pahayag han usa nga parag-uma, "Naaro kami hin pasaylo ha mga kasama nga han antemano nga arangkada han panlasurbo han kaaway, nautod an amon sumpay ha hukbo dara nga nahadlok kami."

Luyo hini, mapaso gihapon an ira pagkarawat ha mga kasama nga waray man gud bumaya ha ira. Tungod kay aada an ira hukbo, nagpapabilin an ira kaandaman nga atubangon nga pakasyon an pasista nga pangatake han kaaway.

Pira kaoras la poyde magiha an masa nga tinambong ha katitirok tungod ha kagipitan ha

seguridad. Sanglit dagmit nga gintalakay han mga kasama an mga prinsipal nga isyu han masa, kalakip an hiunong ha pasismo han rehimen Duterte, an natikagrabe nga krisis durot han pakyas nga pagresponde han rehimen ha pandemya, gios ngan kamutangan han kaaway ha rehiyon, kamutangan han rebolusyunaryo nga kagiusan, an pagtagad ha mga surenderi ngan an mga pitad para hini.

Pulitika pa gihapon an prinsipal nga daup han mga kasama agud tagdon an mga surenderi ngan impormer han kaaway nga gintukod ha lugar. Mayda 15-20 katawo an ira ginsagdunan nga igsalikway an panhugay, pan-gigipit, ngan panharas ha ira han pasista nga kaaway.

Nagpanhatag liwat an mga kasama han mga rebolusyunaryo nga barasahon sugad han *Ang Bayan* ngan *Larab*, haglipot nga giya hiunong ha pag-atubang ha pan-gigipit ngan kampanya nga pagpasurender han kaaway, hanbuk hiunong ha COVID-19, ngan mga polyeto.

Kahuman han aktibidad, marayahak ngan hitaas an moral diri la han masa kundi bisan han mga kasama. Ha luyo han paningkamot han kaaway

nga utdon an sumpay han masa ngan ira hukbo, diri mapupugngan an masa nga umato ngan pakasyon an pasista nga todo-gerra han rehimen Duterte. ■



HA KAMATUORAN

Sobra

₱302

kamilyon nga ayuda tikang ha **Bayanihan 1** ngan **2** an **waray pa madistribwer.**

Reperens: Department of Labor and Employment (DOLE)

Maabot na ha

₱11.071

katrilyon an **utang han Pilipinas.**

Reperens: Bureau of the Treasury (BTr)

109

kamilyon na an **populasyon han Pilipinas.**

Reperens: Philippine Statistics Authority (PSA)

Pahibaro

Gin-gawas na an *audio* nga bersyon han *Larab* ngan Winaray nga bersyon han *Ang Bayan!*

Poyde ini kuhaon ha pinakahirani nga sanga han Partido o yunit han BHB ha iyo lugar. Poyde liwat ini makuha ha *website* han Partido Komunista ng Pilipinas ha cpp.ph o ha ira Facebook *page* ha fb.com/editorsofAB.

Pamatian ngan ipasamwak!